



2 Mac 2012 (Jumaat) - Kertas siasatan NFC dikembalikan kepada polis

KUALA LUMPUR 2 Mac — Peguam Negara telah mengembalikan kertas siasatan berhubung Perbadanan Fidlot Nasional (NFCorp) kepada polis untuk siasatan lanjut, kata Timbalan Ketua Polis Negara, Datuk Seri Khalid Abu Bakar hari ini. Beliau berkata, polis akan mematuhi arahan Peguam Negara untuk membuat siasatan lanjut terhadap NFCorp. "Kita akan akur dengan arahan daripada Peguam Negara untuk jalankan apa juga siasatan (NFCorp)...janganlah buat apa-apa andaian," katanya kepada pemberita selepas menutup Program Diploma Sains Siasatan Maktab Polis DiRaja Malaysia, Cheras di sini, hari ini. Isu NFCorp berbangkit berikutan Laporan Ketua Audit Negara 2010 Oktober lalu yang menyatakan ia gagal memenuhi matlamat penubuhannya, manakala pembangkang mendakwa berlaku penyelewengan dalam pengurusan dana syarikat itu. Pada majlis itu, Khalid menyampaikan diploma kepada 38 graduan yang menamatkan pengajian bagi sesi 2010/2011.



3 Mac 2012 (Sabtu) - Pembangkang putar belit - NFCorp

KUALA LUMPUR 3 Mac - National Feedlot Corporation Sdn. Bhd. (NFCorp) mendakwa pembangkang mengelirukan rakyat Malaysia dengan fakta tidak tepat berhubung perbadanan itu semata-mata untuk keuntungan politik. NFCorp dalam satu kenyataan berkata, mereka telah bekerjasama sepenuhnya dengan pihak polis dan Suruhanjaya Pencegahan Rasuah Malaysia (SPRM) berhubung isu tersebut. "Nilai pengeluaran daripada pinjaman kerajaan kekal rahsia dalam kumpulan syarikat dan ia ada disebut dalam laporan tahunan yang telah diaudit serta difahami oleh seluruh lembaga pengarah. "Pada tahun 2006 juga, NFCorp telah menjelaskan secara terperinci cadangan struktur korporat kepada kerajaan yang meliputi baka ternakan import, baka tempatan, jualan dan pemasaran, restoran dan bilik pameran daging, penjenamaan, promosi, harga, pemprosesan, baja, logistik dan perkara lain yang memenuhi keperluan Polisi Daging Negara (Sektor Ruminan) 2006," katanya. Menurut kenyataan itu, NFCorp sentiasa mengadakan perbincangan dengan kerajaan sejak 2009 lagi. "Bahkan, syarikat telah mengemaskini struktur korporat terbaru yang bergabung di bawah National Meat and Livestock Corporation Sdn. Bhd. untuk mengelakkan kekeliruan dengan Pusat Fidlot Nasional. Tambah kenyataan itu lagi, pembangkang tidak pernah ada di dalam mesyuarat-mesyuarat kerajaan berhubung NFCorp atau mesyuarat lembaga perbadanan itu. "Bagaimana mereka boleh memutarbelitkan fakta jika tidak pernah menghadirkan diri dalam mana-mana mesyuarat kami, semua maklumat berkaitan NFCorp hanyalah rekaan dan gambaran yang keterlaluan," jelasnya.



5 Mac 2012 (Isnin) - Tiada kontrak melombong pasir diberi kepada Double Dignity

SHAH ALAM 5 Mac - Dua wakil rakyat Pakatan Rakyat Selangor hari ini mengulangi bahawa syarikat Double Dignity (M) Sdn. Bhd., yang mana mereka pernah memegang jawatan pengarah, tidak pernah menerima kontrak melombong pasir di negeri itu dari Kumpulan Semesta Sdn. Bhd. (KSSB), syarikat subsidiari kerajaan negeri Selangor dan pemegang konsesi perlombongan pasir. Ahli Dewan Undangan Negeri (ADUN) Seri Muda, Shuhaimi Shafiei dan ADUN Batu Caves, Amiruddin Shari berkata demikian pada hari pertama sesi pendengaran awam Jawatankuasa Pilihan Khas Mengenai Keupayaan, Kebertanggungjawaban dan Ketelusan Selangor (Selcat) berhubung isu penyelewengan pasir di sini, hari ini.

Shuhaimi berkata, adalah mustahil bagi Double Dignity untuk mendapatkan apa-apa kontrak melombong pasir kerana ia tidak mendaftar dengan KSSB. "Saya tidak pernah tolong mana-mana syarikat termasuk syarikat Double Dignity untuk mendapatkan kontrak yang dibuka KSSB kerana 'nature of business' berbeza dan lebih-lebih lagi syarikat itu tidak didaftarkan dengan KSSB," katanya dan menambah beliau telah menyerahkan surat perletakan jawatan sebagai pengarah Double Dignity pada 2010. "Sehubungan itu, dakwaan penulis blog (penulis blog dalam pelarian Raja Petra Kamaruddin) yang menuduh Double Dignity telah memohon untuk melombong pasir adalah tuduhan yang dirancang untuk memberi imej buruk kepada kerajaan Selangor dan seluruh ADUN Pakatan," katanya.



6 Mac 2012 (Selasa) - PAC Perak gesa masalah aktiviti korek pasir ditangani

IPOH 6 Mac — Jawatankuasa Kira-Kira Wang (PAC) Perak meminta semua agensi penguatkuasaan bekerjasama bagi menangani masalah yang timbul disebabkan aktiviti mengorek pasir sungai. Pengerusinya, Datuk Seri Raja Ahmad Zainuddin Raja Omar berkata, ini kerana kegagalan memantau aktiviti itu menyebabkan negeri mengalami kerugian hasil serta memberi kesan kepada ekosistem semula jadi sungai-sungai di Perak. "Taksiran kerosakan (akibat aktiviti mengorek pasir di sungai) pada tahun 2006 adalah sebanyak RM4.5 juta dan ia terus meningkat sehingga ke hari ini," katanya kepada pemberita di sini hari ini. Beliau memberikan contoh aktiviti pengambilan pasir di Kampung Sungai Kelawar yang terletak di sempadan Perak dan Selangor telah merosakkan kawasan sungai serta jalan raya. Selain itu, aktiviti mengorek pasir itu juga dikhuatiri akan menimbulkan masalah serius kerana semua loji pembersihan air Lembaga Air Perak terletak berhampiran sungai. "Kita juga mencadangkan supaya Pejabat Tanah dan Galian (PTG) negeri supaya melihat semula ketetapan dan peraturan sedia ada bagi memastikan aktiviti ini tidak memberikan kesan yang tidak baik kepada kualiti air," katanya.



10 Mac 2012 (Sabtu) - Nafi empangan pecah punca banjir - Oleh ADLINAHANI KHALIL pengarang@utusan.com.my

KUALA LUMPUR 10 Mac - Syarikat Bekalan Air Selangor Sdn. Bhd. (Syabas) menafikan dakwaan sesetengah pihak yang mengatakan bencana banjir di sekitar ibu negara dan pinggir bandar pada Rabu lalu berpunca daripada empangan pecah. Ketua Pegawai Eksekutifnya, Datuk Ruslan Hassan menyifatkan dakwaan tersebut sebagai tidak berasas dan alasan semata-mata untuk menuding jari kepada Syabas atas bencana yang berlaku. Beliau berkata, hujan yang luar biasa menyebabkan satu daripada kawasan yang terjejas teruk iaitu Lembah Jaya Ampang tidak mampu menampung takungan air, sekali gus menjadikan paras sungai meningkat dan melimpah. "Saya minta kepada sesetengah pihak agar tidak menuding jari kepada Syabas atas bencana yang berlaku kerana ia bukan berpunca daripada empangan pecah, malah tiada empangan di daerah Ampang. "Syabas sentiasa berusaha untuk membekalkan perkhidmatan yang terbaik kepada masyarakat sekeliling dan kami akan meneruskan usaha itu," katanya selepas menyertai aktiviti Gotong-Royong Perdana bagi membantu mangsa-mangsa banjir di Lembah Jaya Ampang, di sini hari ini. Dalam pada itu, seramai 400 kakitangan Syabas dan Puncak Niaga (M) Sdn. Bhd. (PNSB) menyertai aktiviti gotong-royong tersebut bagi membantu mangsa-mangsa banjir membersihkan kawasan sekitar terutamanya kediaman yang musnah, selain bantuan bekalan air bersih menerusi 15 lori tangki berkapasiti 1,200 liter. Selain itu, Ruslan turut menghulurkan sumbangan 400 botol air minuman kepada mangsa-mangsa banjir untuk kegunaan harian. "Aktiviti (gotong-royong) ini merupakan satu daripada tanggungjawab sosial Syabas dan berharap dapat meringankan beban mangsa, lebih-lebih lagi dengan ketiadaan bekalan air bersih.

"Syabas akan terus menghantar bekalan air bersih ke Lembah Jaya Ampang sehingga keadaan stabil, namun kerja-kerja pembersihan akan mengambil masa ekoran kenderaan berat tidak dapat memasuki jalan yang sempit dan bergantung kepada tenaga manusia," ujarnya. Jelas Ruslan lagi, Syabas akan berusaha untuk memulihkan bekalan air di kawasan terjejas dalam masa terdekat.



12 Mac 2012 (Isnin) - Kes NFCorp : Salleh Ismail didakwa pecah amanah RM49.7j - Oleh SITI NOORALINA AHMAD

KUALA LUMPUR 12 Mac - Pengarah National Feedlot Corporation (NFCorp), Datuk Salleh Ismail mengaku tidak bersalah di Mahkamah Sesyen di sini hari ini atas tuduhan pecah amanah melibatkan RM49.7 juta milik syarikat tersebut. Tertuduh didakwa menyalahgunakan RM9,758,140 untuk membayai 2 unit kondominium, manakala sebanyak RM40 juta dengan memindahkan ke dalam akaun syarikat milik keluarganya, National Meat Livestock Corporation Sdn. Bhd. Dia juga didakwa atas dua pertuduhan mengikut Akta Syarikat 2001 iaitu melakukan kedua-dua perbuatan tersebut tanpa kebenaran mesyuarat agung NFCorp. Hakim S.M. Komathy Suppiah menetapkan jaminan RM500,000 bagi kesemua pertuduhan dan memutuskan 13 April ini sebagai tarikh sebutan kes.



14 Mac 2012 (Rabu) - Rampas tanah YBK tindakan zalim, angkuh

SHAH ALAM 14 Mac - Kerajaan Parti Keadilan Rakyat (PKR) Selangor disifat sebagai angkuh dan zalim apabila bertindak merampas tanah milik Yayasan Basmi Kemiskinan (YBK) hanya kerana yayasan itu tidak mahu dijadikan alat politik. Pengurus Majlis Pertubuhan Sukarela Selangor (MGPSS), Datuk Mat Yasir Ikhsan berkata, YBK adalah sebuah pertubuhan kebajikan yang ditubuhkan untuk membantu mewujudkan peluang pendidikan kepada anak-anak miskin yang sepatutnya dibantu, bukannya dizalimi sedemikian rupa. "Apa yang dilakukan oleh YBK sejak awal penubuhannya pada 1990 berjaya membantu pendidikan anak-anak daripada golongan miskin di negeri ini. "Kita kesal tindakan kerajaan negeri yang zalim, menganiaya bukan hanya kepada YBK malah, menafikan hak anak-anak orang miskin dan tidak berkemampuan untuk mendapat pembelaan yang sewajarnya. "Tanah YBK itu merupakan aset untuk pembangunan modal insan Selangor pada masa depan," katanya kepada *Utusan Malaysia* di sini hari ini. Beliau mengulas laporan akhbar hari ini yang memetik Perdana Menteri, Datuk Seri Najib Tun Razak berkata, program transformasi membasmikan kemiskinan di negeri itu menghadapi kekangan ekoran sikap kerajaan negeri yang ditadbir oleh pakatan pembangkang termasuk melibatkan kes tanah YBK di Serendah yang telah dirampas dan dikaveat.

Pada 3 Februari 2010, kerajaan negeri mengambil keputusan merampas tanah milik YBK Selangor di Serendah walaupun tunggakan cukai sebanyak RM5.7 juta semuanya telah dilunaskan oleh yayasan itu dengan bantuan Yayasan Melaka. Keputusan yang diumumkan oleh Abdul Khalid atas alasan YBK telah gagal mematuhi beberapa peraturan ditetapkan oleh kerajaan negeri termasuk membayar cukai tanah secara berperingkat-peringkat mengikut tempoh yang dibenarkan. Berdasarkan laporan media sebelum ini, kerajaan negeri telah merampas 191 hektar tanah milik YBK manakala 324 hektar lagi dikaveat menyebabkan YBK tidak boleh membangunkan apa-apa program di atas tanah berkenan. Mat Yasir berkata, pihaknya percaya tindakan kerajaan negeri merampas dan kaveat tanah milik YBK itu berkait rapat dengan agenda politik PKR memandang kerajaan negeri sebelum ini memaksa Ahli Lembaga Pemegang Amanah YBK melantik Menteri Besar, Tan Sri Abdul Khalid Ibrahim sebagai Pengurus yayasan itu. Beliau berkata, YBK menolak penglibatan Menteri Besar itu kerana yayasan berkenaan tidak mahu diwakili oleh individu politik memandangkan YBK merupakan sebuah pertubuhan bebas dan tidak memihak mana-mana politik kepartian.

"YBK adalah pertubuhan yang bekerjasama dengan semua pihak untuk membantu golongan miskin dan tidak berkemampuan. Saya fikir, kerajaan negeri suka mempolitikkan semua hal dalam pentadbiran negeri. "Namun, dalam soal menjaga kebaikan dan membantu rakyat khususnya anak-anak golongan susah, janganlah kerajaan negeri cuba mengheret YBK dalam kancah politik dan kepentingan mereka," katanya yang juga merupakan Ahli Lembaga Pemegang Amanah YBK. Sementara itu, Pengurus Sekretariat Orang Muda Selangor (Serang), Budiman Mohd. Zohdi turut menyelar tindakan kerajaan negeri terhadap YBK yang memperlihatkan sikap tidak ikhlas kerajaan negeri dalam membantu golongan miskin dan tidak berkemampuan di negeri itu. Katanya, slogan negeri berkebaikan yang dilaungkan oleh mereka hanya satu gambaran palsu untuk mengaburi mata rakyat kononnya memberi tumpuan kepada hak rakyat di Selangor. Hakikatnya, jelasnya, hasrat YBK untuk melaksanakan Program Transformasi Lima Tahun (2012-2016) bagi membangunkan pendidikan golongan miskin dan tidak berkemampuan di negeri ini sukar dilaksanakan kerana keangkuhan kerajaan negeri. "Walaupun YBK ditubuhkan ketika pentadbiran Barisan Nasional (BN), tidak sewajarnya YBK dilayan seperti musuh politik kerana ia bukan parti politik sebaliknya badan yang diamanahkan untuk menjaga dan membantu golongan yang tidak berkemampuan melalui penyediaan peluang pendidikan. "Maka, kerajaan negeri harus sedar akan komitmen YBK ini, bukannya menganiaya dan menyekat usaha YBK meneruskan agenda pembangunan rakyat di negeri ini," katanya.



19 Mac 2012 (Isnin) - NFCorp belum buat bayaran balik pinjaman

KUALA LUMPUR 19 Mac - National Feedlot Corporation (NFCorp) masih belum memulakan pembayaran balik pinjaman kerajaan berjumlah RM250 juta yang sepatutnya bermula Januari lalu. Pengurus Jawatankuasa Kira-Kira Wang Negara (PAC), Datuk Seri Azmi Khalid berkata, pinjaman itu sepatutnya telah mula dibayar balik tahun ini selepas perjanjian pinjaman ditandatangani pada 6 Disember 2007 lalu. "Memang ada jadual pembayaran balik, tapi daripada apa yang difahamkan, NFCorp masih belum bayar lagi dan ini berikutan isu kontroversi dalam kes ini," katanya pada sidang akhbar selepas mesyuarat PAC bersama pegawai-pegawai Kementerian Kewangan dan Kementerian Pertanian dan Industri Asas Tani di Parlimen di sini hari ini. Pada 12 Mac lalu, Pengarah NFCorp, Datuk Salleh Ismail mengaku tidak bersalah di Mahkamah Sesyen di sini atas pertuduhan pecah amanah melibatkan RM49.7 juta milik syarikat tersebut. Isu NFCorp berbangkit berikutan Laporan Ketua Audit Negara 2010 yang menyatakan ia gagal memenuhi matlamat penubuhannya manakala beberapa pihak mendakwa berlaku penyelewengan dalam pengurusan dana syarikat itu. NFCorp dalam kenyataan di laman portalnya menyatakan, mereka telah menerima pinjaman pertama berjumlah RM7 juta pada Januari 2008, yang mana pinjaman berskala besar secara berperingkat itu perlu dibayar balik dalam tempoh 20 tahun dengan kadar faedah dua peratus setahun.

Jelas Azmi, PAC akan berjumpa dengan wakil daripada syarikat NFCorp di Parlimen esok untuk menyiapkan laporan mengenai isu perbadanan itu. Jelasnya, siasatan PAC berhubung isu tersebut tidak akan bertindih dengan pendakwaan kes di mahkamah dan pihaknya akan memberi penekanan mengenai sistem tawaran serta pemantauan sesebuah projek. "Kita sedia maklum bahawa sesetengah perkara dalam kes ini mungkin subjudis dan mengganggu perbicaraan mahkamah, namun ini bukan kali pertama kita membangkitkan kes-kes yang sedang dibicarakan di mahkamah. "Yang mana kita tidak boleh bangkitkan perkara yang ada kaitan dengan mahkamah, kita tidak akan bangkitkan," katanya. Sementara itu, NFCorp menjelaskan bahawa NFCorp telah menulis surat kepada kerajaan bagi meminta penangguhan pembayaran balik pinjaman akibat penangguhan pembinaan sebuah rumah penyembelihan kualiti eksport dan infrastruktur oleh pihak ketiga di Gemas, Negeri Sembilan seperti Laporan 2010 Ketua Audit Negara.

Menurut kenyataan NFCorp, berdasarkan perjanjian pelaksanaan dan mesyuarat dengan pihak kerajaan, rumah penyembelihan sepatutnya telah siap dibina pada 2008 dan disewakan kepada NFCorp bagi memenuhi sasaran pengeluaran. Jelas kenyataan itu, bagaimanapun, sehingga hari ini, rumah penyembelihan itu masih belum dibina dan tertangguh selain kelewatan pembinaan infrastruktur iaitu 7.5 km jalan konkrit ke NCF dan sistem air yang terdiri daripada kolam renang, paip dan telaga. "Ekoran itu, NFCorp mengalami kerugian dalam unjuran perolehan kerana pengeluaran daging lembu terganggu," katanya dalam satu kenyataan di sini hari ini.



20 Mac 2012 (Rabu) - Kontrak MRT RM8.2 bilion Oleh Ainul ASNIERA
ahsan ekonomi@utusan.com.my



APABILA siap kelak, projek MRT Malaysia diyakini mampu mengurangkan masalah trafik di Lembah Klang. - Gambar hiasan

KUALA LUMPUR 20 Mac - Syarikat kerjasama MMC Corporation dan Gamuda Bhd. (MMC-Gamuda) dianugerahkan kontrak bernilai RM8.2 bilion oleh Mass Rapid Transit Corporation Sdn. Bhd. (MRT Corp). MRT Corp. dalam kenyataannya berkata, syarikat kerjasama itu dipilih kerana menawarkan harga paling kompetitif bagi kerja-kerja rekaan dan membina terowong bawah tanah sejauh 9.5 kilometer dan tujuh stesen bawah tanah. Keputusan itu dibuat pada mesyuarat Jawatankuasa Pemerolehan Sehenti (OSPC) yang dipengerusikan oleh Perdana Menteri, Datuk Seri Najib Tun Razak, semalam. "MMC-Gamuda dipilih berdasarkan kekuatan mereka dalam rekaan, pembinaan, perkakasan mengorek dan metodologi pembinaan stesen menebuk. "Syarikat itu juga dipilih kerana pengalamannya dalam menguruskan projek SMART," kata kenyataan itu.

Penilaian akhir menunjukkan syarikat kerjasama MMC-Gamuda adalah dinilai sebagai tender terbaik yang menawarkan kriteria teknikal dan bidaan terbaik adalah 3.4 peratus lebih rendah berbanding tawaran kedua terendah. MMC-Gamuda adalah di antara lima syarikat kerjasama yang menerima prakelayakan dalam kriteria untuk melakukan tender pakej bawah tanah untuk projek MRT. Lain-lain pesaing ialah syarikat kerjasama Hyundai-Gadang-Chengal Jaya, Taisei Corp., Sinohydro Group Ltd., dan China Railway Group Ltd. Kelima-lima syarikat itu menyertai tender yang dibuka pada 27 Oktober 2011 dan ditutup pada 27 Januari 2012. Ketua Pegawai Eksekutif MRT Corp. Datuk Azhar Abdul Hamid berkata, kerja-kerja mengorek itu akan memerlukan kerja-kerja bawah tanah pada skala yang belum pernah dilakukan. Katanya, pakej terbesar tunggal MRT menjadikan ia 30 hingga 40 peratus daripada jumlah kos projek.

KUALA LUMPUR 20 Mac - Pertemuan antara Jawatankuasa Kira-Kira Wang Negara (PAC) dengan National Feedlot Corporation Sdn. Bhd. (NFCorp) di Parlimen hari ini tidak membawa hasil yang diharapkan apabila syarikat itu hanya diwakili seorang eksekutif dan dua peguam. Pengurus PAC, Datuk Seri Azmi Khalid berkata, dalam pertemuan kira-kira 45 minit itu, pihaknya tidak mendapat jawapan yang memuaskan kerana eksekutif itu tidak mempunyai akses tinggi dalam syarikat tersebut. "Datuk Seri Mohamad Salleh Ismail (Pengurus Eksekutif NFCorp) tidak hadir, mungkin dia bimbang apa dia akan perkatakan hari ini akan digunakan di mahkamah," katanya kepada pemberita di lobi Parlimen di sini hari ini. Pada 12 Mac lalu, Mohamad Salleh mengaku tidak bersalah di Mahkamah Sesyen di sini atas pertuduhan pecah amanah melibatkan RM49.7 juta milik syarikat tersebut.

KUALA LUMPUR 21 Mac - Jawatankuasa Kira-Kira Wang Negara (PAC) akan meminta Kementerian Kewangan dan Kementerian Pertanian dan Industri Asas Tani menyerahkan dokumen-dokumen penting berkaitan National Feedlot Corporation Sdn. Bhd. (NFCorp). Pengurusnya, Datuk Seri Azmi Khalid berkata, pihaknya menjangkakan dokumen-dokumen berkenaan dapat diperoleh dalam minggu ini bagi membantu siasatan PAC berhubung isu NFCorp. "Kami akan mendapatkan dokumen berkaitan perjanjian pinjaman daripada Kementerian Kewangan dan dokumen mengenai pelaksanaan projek serta perolehan tanah daripada Kementerian Pertanian dan Industri Asas Tani. "Secara dasarnya PAC sudah membuat keputusan untuk meneruskan siasatan terhadap NFCorp. Bagaimanapun, ia (siasatan) tidak berkaitan dengan tuduhan di mahkamah, sebaliknya menjurus kepada pengurusan pinjaman kewangan yang diterima daripada kerajaan," katanya pada sidang media di bangunan Parlimen, di sini hari ini. Menurut Azmi, bagi menentukan hala tuju siasatan PAC dalam isu NFCorp, pihaknya juga telah merujuk kepada Yang Dipertua Dewan Rakyat, Tan Sri Pandikar Amin Mulia. "Beliau (Pandikar) menasihatkan PAC supaya tidak menyentuh sebarang perkara berkaitan kes di mahkamah," katanya. Pada 12 Mac lalu, Pengurus Eksekutif NFCorp, Datuk Mohamad Salleh Ismail mengaku tidak bersalah di Mahkamah Sesyen, di sini atas pertuduhan pecah amanah melibatkan RM49.7 juta milik syarikat tersebut. Isu NFCorp berbangkit berikutan Laporan Ketua Audit Negara 2010 yang menyatakan ia gagal memenuhi matlamat penubuhannya manakala beberapa pihak mendakwa berlaku penyelewengan dalam pengurusan dana syarikat itu.